

Ini Sa Libelu Sa Medoo

ISALEM

Ini Denu Sa Libelu Sa Medoo Isalem

Ini libelu sa medoo duyuy. Eg-usalen sa etaw Hudiyu siini medoo duyuy amuk egsimbà da owoy eg-oloen da ma Nemula i. Pinetulengtuleng da ma sa mepion ketabang i Nemula egoh da egkepasangan. Si Datù Dabid sa duma da migbael sa medoo duyuy diyà siini libelu. Egoh i Dabid batàbatà pelawà, kagdi sa tegeipat kebibibili (basa ko diyà Isalem 23).

Diyà sa langun Kagi i Nemula, kansad 119 sa tigtu metaes owoy denu sa Kagi i Nemula sa medoo lemilu di.

Salmo 1

Ini Denu Sa Etaw Tigtu Meanggan

¹Meanggan sa etaw endà egpangunut diyà sa ketulù sa medaet etaw, owoy sa endà eg-iling sa egbaelan sa tegebael salà owoy sa endà eg-unut-unut diyà sa etaw tegepeumàumà si Nemula.

²Dodoo egkeanggan polo egpangunut diyà sa uledin i Datù Nemula, owoy egpenemdemen di ma agdaw owoy sigep. ³Kagdi lagà sa kayu egtunas diyà sa kilidan wayeg, owoy egbunga ma amuk meuma sa sasang kebunga di owoy endà ma lumegupay sa medoo daun di. Amuk hediya, tigtu mebaluy sa langun egbaelan di.

⁴Dodoo endà hediya sa mebaelan sa medoo etaw tegebael medaet, enù ka lagà da polo sa opoh egkelayap kelamag. ⁵Huenan di, endà duen sa mepion ketamanan sa medoo tegebael salà amuk meuma sa agdaw kekukum i Nemula, owoy endà ma mekeamut da diyà sa medoo etaw épê metudà adat.

⁶Na, egtulikan i Nemula sa medoo metiengaw etaw, dodoo medaet sa ketamanan sa medoo tegebael salà.

Salmo 2

Ini Denu Sa Datù Hinemilì I Nemula

¹Maen di ya egpenemdem sa medoo balangan etaw umatu diyà si Nemula? Egpenemdem sa medoo etaw sa pandapat da umatu, dodoo endà ma duen sa ketebowon di. ²Nesetipon sa medoo datù da owoy sa medoo ulu-ulu da, owoy nesesebaen sa pedu da anì atuwan da Nemula i owoy sa datù hinemilì di. ³Eg-ikagi da, guwaen da, “Meked ki egpesabà diyà kenagda. Bugtusen ta sa lagà sangkali igpolot da kenita enù ka meked ki egpeudipen diyà kenagda.”

⁴Dodoo eggemen daa Datù Nemula i egpenuu diyà sa metolol bangkù di dutu langit dò, owoy egpelononon di kagda. ⁵Agulé danà sa kebulit di, inindaw di kagda owoy linimedang di ma kagda danà di nelangget. ⁶Mig-ikagi, guwaen di, “Pinepenuu ku dé sa datù hinemilì ku diyà sa getan Siyon,^a sa mapulù getan ku.”

⁷Mig-ikagi sa datù hinemilì i Nemula, guwaen di, “Tulonon ku sa inikagi i Datù Nemula diyà kenak, guwaen di, ‘Kuna sa anak ku, owoy igpetiig ku dé ini egoh di aken sa emà ko. ⁸Pegeni ko diyà kenak sa langun balangan etaw owoy ibegay ku diyà keniko lapeg sa sinukub langit. ⁹Pigtamayan ko sa medoo kuntelà ko lagà pesaen ko kagda sa balbal putow, owoy lupeten ko ma lagà sa kuden tanà.’ ”

¹⁰Huenan di, o medoo datù diyà tanà owoy medoo ulu-ulu, tulik yu owoy hahaa yu. Petow ki daa pigtamayan sa datù hinemilì i Nemula kiyu. ¹¹Pangunut yu diyà si Datù Nemula danà yu egkelimedangan diyà kenagdi, owoy adati yu ma danà yu egkeanggan. ¹²Petukééy yu diyà kenagdi, enù ka petow ki daa tumbow sa kebulit di keniya owoy pigtamayan di ma kiyu. Dodoo meanggan sa etaw mangay dumapag diyà kenagdi enù ka ipaten di.

Salmo 8

Ini Denu Sa Dakel Egkegaga I Nemula

¹O Datù Nemula, sa Nemula ké, tigtu mapulù sa ngadan ko diyà siini sinukub langit. Owoy nekeuma diyà dibaluy langit sa keolò da sa dakel egkegaga ko. ²Apiya sa medoo batà taman sa medoo egsusu pelawà, tinulù ko kagda anì oloen da ma sa dakel egkegaga ko. Huenan di, melugpi sa medoo kuntelà ko. Endà dé duen sa egkegaga da kumuntelà diyà keniko.

³Amuk eglengag a diyà langit, eghauwen ku sa langun binaelan ko danà sa dakel egkegaga ko, sa bulan owoy sa medoo bituen igtagù

^a 2:6 Sa getan Siyon, iya sa getan diyà Hélusalém.

ko diyà sa kenà da. ⁴Huenan di, egpekeigsà a diyà sa munoy pedu ku ngadan sa pesuwan ko egpeketuleng kenami i etaw, owoy maen di ya eg-ipaten ko, enù ka etaw ké daa. ⁵Dodoo pinedakel ko doo sa etaw enù ka buyu ké doo egpeketepeng diyà sa medoo egsugùsuguen ko diyà langit, owoy binegayan ko ma kami egkegaga owoy tigdeg lagà sa datù. ⁶Pineduen ko sa milantek penemdem ké eg-ipat sa langun binaelan ko, enù ka kami sa pineulu-ulu ko diyà sa langun pineduen ko, ⁷sa medoo kebilibili owoy sa medoo sapi owoy sa langun uled tanà diyà ketalunan, ⁸owoy sa medoo manuk eglayanglayang diyà awang, owoy sedà owoy sa langun eg-ipanaw diyà dagat.

⁹O Datù Nemula, sa Nemula ké, tigtu mapulù sa ngadan ko diyà siini sinukub langit.

Salmo 23

Si Nemula Sa Eg-ipat Sa Medoo Etaw Di

¹Si Datù Nemula sa eg-ipat kenak lagà sa tegeipat kebilibili, huenan di endà duen sa kulang diyà kenak. ²Egpeetuden sa tegeipat kebilibili sa medoo kebilibili di diyà sa keluwen meluenaw kenà da tumabtab owoy eg-uwiten di ma kagda diyà sa wayeg metiengaw. Hediya mendaa sa keipat i Nemula kenak. ³Egpebagelen di aken amuk egkelungoy a. Itulù di diyà kenak sa dalan mepion ukitan ku anì meadatan sa ngadan di.

⁴Apiya di pa mekeukit a diyà sa sugud deleman tolol kenà mematay, endà doo melimedangan a, o Datù Nemula, enù ka eg-unut-unut ka diyà kenak. Owoy eg-ipaten ko aken danà sa tuked ko owoy sa balbal ko, huenan di metanà doo sa pedu ku.

⁵Egtapayen ko sa kaenen ku diyà sa taengan sa medoo kuntelà ku. Eghududan ko lana sa ulu ku tandà sa keadat ko kenak, owoy egsuwék sa tabù ku tandà sa egoh di endà duen sa kulang ku. ⁶O Datù Nemula, netiigan ku umunut-unut sa keupion ko kenak owoy sa kehidu ko kenak taman sa egoh ku nehagtay, owoy mekeugpà a ma diyà sa dalesan ko taman melugay.

Salmo 27

Ini Denu Sa Kesalig Ta Diyà Si Nemula

¹Si Datù Nemula sa legdaw ku owoy sa tegealuk ku ma, huenan di endà duen sa egkelimedangan ku. Si Datù Nemula sa tigtu eg-ipat kenak, huenan di endà duen sa egsesuwan ku.

²Amuk pengayawen a sa medoo etaw tegebael medaet owoy imatayan da aken hedem, kagda polo sa mekedagsà owoy sa mematay. ³Apiya di pa

seulingutan a sa medoo sundalu, endà doo melimedangan a. Owoy apiya di pa gebeken da aken, tapay a doo sumalig diyà si Nemula.

⁴Sebaen daa sa egpegeniyen ku diyà si Datù Nemula sa egoh ku mekeugpà diyà sa dalesan di taman sa egoh ku nehagtay, anì takaan ku menemdem sa tigtu mepion adat di owoy sumimbà a ma diyà sa metolol dalesan di. ⁵Enù ka ipaten di aken amuk meuma sa sasang medaet. Ilidung di aken diyà sa dalesan di owoy lagà peugpaen di aken diyà sa mehagtaw getan anì endà meuma a sa medaet. ⁶Huenan di, petabanen di aken diyà sa medoo kuntelà ku nekeulingut diyà kenak. Agulé mekeunut sa kepetibos ku egkeanggan diyà sa kebegay ku sa medoo hinagtay egulowen diyà sa Dalesan i Nemula. Duyuyen ku Datù Nemula i owoy oloen ku ma.

⁷O Datù Nemula, dinegdineg ka amuk eg-umowen ku kuna. Hiduwi ko aken owoy sagbì ka ma. ⁸Enù ka iya sa kagi ko, guwaen ko, “Pedapag yu owoy simbà yu diyà kenak.” Huenan di, migsagbì a, guwaen ku, “O Datù Nemula, pedapag a doo diyà keniko.” ⁹Yaka eglidungan kenak amuk egpengauwen ku kuna. Yaka egbulit kenak, owoy yaka ma eg-iniyugan kenak, aken i egsuguen ko, enù ka kuna sa atung egtabang diyà kenak. Yaka eg-eked kenak owoy yaka ma egpandayà kenak, enù ka kuna, o Nemula, sa tegealuk kenak. ¹⁰Apiya di pa pandayaen a sa emà ku owoy sa inay ku, si Nemula doo sa umipat kenak.

¹¹O Datù Nemula, tului ko diyà kenak sa mepion egbaelan ku owoy pehauwi ko diyà kenak sa dalan metudà, enù ka medoo sa kuntelà ku egpengaa sa kenà ku medaetan. ¹²Yaka egpandayà duu sa kebael da medaet diyà kenak, enù ka medoo sa butbuten egtipu kenak owoy egpelihayen da ma aken. ¹³Dodoo netiigan ku doo, o Datù Nemula, kuna sa umaluk kenak anì hauwen ku sa dakel kehidu ko kenak egoh ku nehagtay pelà diyà tanà.

¹⁴Na, salig yu diyà si Datù Nemula. Pebagel yu sa pedu yu owoy yoko egkelimedangan na. Salig yu daa diyà si Datù Nemula.

Salmo 34

Ini Sa Keolò Denu Sa Dakel Kehidu I Nemula

¹Pesalamat a takà diyà si Datù Nemula, owoy endà ma sumabuh a umolò kenagdi. ²Si Datù Nemula daa sa pedakelen ku danà sa medoo mepion binaelan di. Na, o medoo etaw egkepelihay, dinegdineg yu owoy keanggan yu ma. ³Peunut yu diyà sa keolò ku si Datù Nemula owoy sesebaenay ki umolò sa mapulù ngadan di.

⁴Migsimbà a diyà si Datù Nemula owoy sinagbian di aken, enù ka kinedanan di sa langun kekelimedang ku. ⁵Meanggan sa etaw petabang

diyà si Nemula, owoy endà ma duen sa pesuwan da memala. ⁶Endà duen sa liyu etaw meketabang kenak, huenan di eg-umow a diyà si Datù Nemula. Hê, sinagbian di owoy inalukan di ma aken diyà sa langun kelikutan ku. ⁷Enù ka sa egsugùsuguen i Nemula sa egtulik sa medoo etaw épê kekelimedang diyà si Nemula, owoy alukan di ma kagda amuk duen sa kelikutan da.

⁸Tepengi yu anì hauwen yu amuk mepion Datù Nemula i. Tigtu meanggan sa etaw egsalig diyà kenagdi. ⁹Adati yu Nemula i, kiyu i medoo etaw di, enù ka endà duen kulang sa etaw eg-adat kenagdi. ¹⁰Apiya sa liyun, duen doo sa egoh da egkeimetan kaenen owoy egpeketues da ma. Dodoo sa etaw egsalig diyà si Nemula, endà dumuen sa kulang di diyà sa mepion hagtay di.

¹¹O medoo loyuk ku batàbatà pelà, angay yu dinegdineg diyà kenak, enù ka itulù ku diyà keniyu sa ukít yu eg-adat diyà si Nemula. ¹²Amuk eg-ungayà yu sa mepion hagtay yu owoy sa lalù endà meelut di owoy sa kekeanggan yu, ¹³ini sa baeli yu. Tulik yu anì endà mekeikagi yu medaet owoy yoko ma egbutbut ta. ¹⁴Eke di yu sa medaet egbaelan. Dodoo baeli yu polo sa mepion, owoy udesi yu ma sa melanih keugpà yu.

¹⁵Tulikan i Datù Nemula sa etaw egbael mepion owoy dinegen di ma sa keingonoy da. ¹⁶Dodoo egkuntelaen di sa medoo etaw tegebael medaet, huenan di melipengan dé sa medoo etaw diyà tanà kagda amuk mematay da.

¹⁷Amuk eg-ingonoy da diyà si Datù Nemula sa medoo etaw egbael mepion, dinegen di kagda owoy alukan di ma diyà sa langun kelikutan da. ¹⁸Medapag Nemula i diyà sa medoo etaw egkedaet pedu, owoy alukan di ma sa medoo etaw tigtu negulub kelikutan.

¹⁹Medoo sa kelikutan egkehaa sa metiengaw etaw, dodoo si Datù Nemula doo sa umaluk kenagda diyà sa langun kelikutan da. ²⁰Enù ka tigtu eg-ipaten i Nemula, owoy endà duen sa sebaen tuelan da metepù.

²¹Sa egbaelan sa medoo tegebael medaet, iya mendaa sa mekepatay kenagda, owoy mepigtamayan ma sa etaw egkelepuh sa medoo metiengaw etaw. ²²Dodoo alukan i Datù Nemula sa medoo etaw di, owoy endà pigtamayan di duu sa medoo etaw egsalig diyà kenagdi.

Salmo 37

Ini Sa Ketamanan Sa Etaw Egbael Mepion Owoy Sa Egbael Medaet

¹Na, yaka egkebukul la danà sa medoo etaw tegebael salà, owoy yaka ma egkesina ya diyà sa egkegaga sa etaw tegebael medaet, ²enù ka tumalà da daa lagà sa keluwen melongu, owoy mekedan da lagà sa bulok melones.

³Dodoo salig ka polo diyà si Datù Nemula owoy baeli ko ma sa mepion. Amuk hediya, kumepion sa keugpà ko diyà tanà owoy kumediya ma sa medaet diyà keniko. ⁴Pengaa ko daa sa keangganan kenà i Datù Nemula metuuwan, agulè ibegay di diyà keniko sa ungayà sa pedu ko.

⁵Peépéi ko diyà si Datù Nemula sa langun egbaelan ko. Salig ka diyà kenagdi, enù ka kagdi sa tumabang keniko. ⁶Amuk hediya, ipehaa di sa metiengaw adat ko diyà sa langun etaw, owoy mehaa sa metudà adat ko lagà sa letak agdaw amuk mekebugsang.

⁷Salig ka diyà si Datù Nemula, owoy petaes ko sa tali ko angat-angat sa ketabang di keniko. Yaka egkelakà ya amuk atung egkekawasà sa etaw tegebael medaet, owoy yaka egkebukul la diyà sa medoo pandapat da egbael medaet.

⁸Sabuhi ko sa kebulit ko, owoy yaka ma egkelangget ta. Yaka egkebukul la enù ka mekepedaet iya wé. ⁹Iya sa kagi ku enù ka mepigtamayan sa medoo etaw tegebael medaet, dodoo umépè polo tanà sa etaw egsalig diyà si Datù Nemula.

¹⁰Endà melugay di mekedan sa medaet etaw. Apiya di pa pengauwen ko diyà sa kenà da, endà dé hauwen ko duu dahiya. ¹¹Dodoo sa etaw egpetukééy, iya polo sa mekéépè tanà owoy tigtu kumelanih sa keugpà di.

¹²Na, sa medoo tegebael salà, pulung daa medaet sa egpenemdemen da diyà sa medoo egbael mepion, owoy egpengetngeten da sa ngipen da danà sa kekelepuh da. ¹³Dodoo eggemenan i Datù Nemula daa kagda, enù ka netiigan di medapag dé sa egoh da mepigtamayan.

¹⁴Hinugut sa medoo tegebael medaet sa sundang da owoy binébét da ma sa busug da anì imatayan da sa medoo pubeli owoy sa medoo etaw egkepelihay, lapeg sa medoo tegebael mepion. ¹⁵Dodoo iya mendaa sa mekepatay kenagda sa hagda doo munoy sundang owoy metepù ma sa busug da.

¹⁶Uman pa mepion sa egoh di tukééy daa sa langun taman ko danà sa metiengaw adat ko diyà sa egoh ko migkekawasà danà ko migbael medaet, ¹⁷enù ka kedanan i Nemula sa egkegaga sa etaw tegebael medaet, dodoo pebagelen di polo sa etaw egbael mepion.

¹⁸Eg-ipaten i Datù Nemula takà sa etaw egpangunut diyà kenagdi, owoy mesakem da ma sa untung endà mekedan. ¹⁹Amuk tumbow sa medaet keugpà, endà mekesugsug da enù ka dumuen sa kaenen da amuk sasang bitil. ²⁰Dodoo mekesugsug sa medoo tegebael medaet. Mekedan doo sa medoo kuntelà i Datù Nemula lagà bulok diyà ketalunan, enù ka melemu da daa mekedan lagà sa lugbuk.

²¹Amuk duen sa sinagbayan sa etaw tegebael medaet, endà dé ipelikù di duu diyà sa épè di. Dodoo sa etaw egbael mepion, metawag polo egbegay. ²²Mekéépè tanà sa etaw egtabangan i Datù Nemula, dodoo mehemagawan polo sa etaw egkelepuhan di.

²³Amuk metuuwan Datù Nemula i diyà sa egbaelan sa etaw, tuluan di sa ukitan di owoy tulikan di ma. ²⁴Apiya di pa egpekebigkil, endà doo mekedagsà di, enù ka si Nemula mendaa sa egtabang kenagdi.

²⁵Ini egoh lukes a dé, dodoo edung egoh ku batà pelà, endà duen sa etaw hinaa ku pinandayà i Nemula amuk egbael mepion, labi pa amuk takà egpegeni kaenen sa medoo anak di. ²⁶Dodoo metawag da polo egbegay, owoy egpesagbay da ma diyà sa medoo duma da, owoy metabangan i Nemula sa medoo anak da.

²⁷Eke di yu sa medaet, owoy baeli yu polo sa mepion anì mekeugpà yu diyà sa tanà tupù yu taman melugay, ²⁸enù ka eghiduwan i Datù Nemula sa etaw épê metudà adat owoy endà pandayaen di duu sa medoo etaw di mepion pedu.

Tulikan di kagda taman melugay, dodoo mekesugsug sa medoo tugod sa etaw tegebael medaet. ²⁹Dodoo sa medoo etaw egbael mepion, meképê da tanà owoy dahiya da mekeugpà taman melugay.

³⁰Na, milantek sa keikagi sa etaw egbael mepion owoy anan tuu sa eg-ikagiyen da. ³¹Egseuwit-uwiten pedu da sa uledin i Nemula, huenan di endà tipayen da duu.

³²Pelaeban sa etaw tegebael medaet sa etaw egbael mepion enù ka egkelukuyan di mimatay. ³³Dodoo endà pandayaen i Datù Nemula duu kagda diyà sa medoo tegebael medaet, owoy endà ma pandayaen di duu diyà sa kenà da eg-antang amuk tipuwen da.

³⁴Salig ka diyà si Datù Nemula owoy pangunuti ko sa langun igsugù di. Tabangan di kuna anì umépê ka tanà owoy hauwen ko ma sa egoh da mekesugsug sa medoo tegebael salà.

³⁵Duen sa etaw dupangdupang hinaa ku épê negaga nekeiling sa metolol kayu migtigdeg diyà sa mepion tanà. ³⁶Dodoo sebaen agdaw egoh ku egtelow, endà dé dahiya di. Apiya di pa egpengauwen ku, endà doo hinaa ku duu.

³⁷Hahaa ko sa metiengaw etaw egbael mepion, enù ka kumedoo sa tugod sa etaw melanih pedu. ³⁸Dodoo mekedan polo sa medoo tegebael salà, owoy mepigtamayan ma sa medoo tugod da.

³⁹Alukan i Datù Nemula sa medoo etaw egbael mepion owoy ipaten di ma kagda amuk meuma sa sasang kelikutan. ⁴⁰Tabangan di kagda owoy ipegaun di kagda diyà sa egkegaga sa medoo tegebael medaet. Alukan di kagda enù ka eg-angay da eg-aput diyà kenagdi.

Salmo 112

Meanggan Sa Etaw Egbael Mepion

¹Meolò Datù Nemula i.

Meanggan sa etaw épê kekelimedang diyà si Nemula owoy sa egkeanggan egpangunut diyà sa medoo igsugù di. ²Mebaluy umépê megaga diyà tanà sa

medoo anak da, enù ka metabangan i Nemula sa langun etaw egbael mepion.

³Kumawasà da, owoy metulengan sa medoo mepion binaelan da taman melugay.

⁴Mepion sa egbaelan da, mehidu da owoy metudà sa adat da, huenan di lagà da sa sulù eglegdaw diyà sa deleman.

⁵Meanggan sa etaw metawag egpesagbay owoy sa épê metudà adat diyà sa langun egbaelan di. ⁶Amuk hediya, endà dé medaetan di owoy metulengan etaw sa mepion binaelan di taman melugay.

⁷Apiya di pa duen sa medaet egdinegen di, endà doo melimedangan di, enù ka mebagel sa pedu di eggalig diyà si Datù Nemula. ⁸Endà mebenges di owoy endà ma melimedangan di, owoy mekeatu doo diyà sa medoo kuntelà di. ⁹Metawag egbegay diyà sa etaw endà duen negaga, owoy metulengan etaw sa medoo mepion binaelan di taman melugay. Mebaluy umépê egkegaga owoy meadatan ma.

¹⁰Dodoo amuk hauwen sa medoo tegebael medaet sa egbaelan sa mepion etaw, mulit da owoy pelengetngeten da sa ngipen da. Mekedan da doo, enù ka endà meketuu sa langun ungayà da.

Salmo 113

Keolò Sa Kehidu I Nemula

¹Meolò Datù Nemula i.

O medoo etaw i Datù Nemula, olò yu sa mapulù ngadan di. ²Meolò sa ngadan i Datù Nemula ini egoh di owoy taman melugay. ³Kedu tebowon agdaw taman salepan, meolò sa mapulù ngadan i Datù Nemula.

⁴Si Nemula daa sa Datù diyà sa langun balangan tanà diyà siini sinukub langit, owoy miglowon pa sa senang di diyà sa langun egbauwen diyà langit. ⁵Endà duen meketepeng si Datù Nemula, sa Nemula ta eg-ugpà diyà sa tigtu mehagtaw kenà di, ⁶huenan di egkudungan di daa sa langit owoy sa tanà.

⁷Upionen di sa medoo etaw, apiya sa medoo etaw pubeli eg-ugpà diyà sa kenà kepung, owoy tabangan di ma sa medoo endà duen negaga.

⁸Peunuten di kagda diyà sa medoo datù eg-ipat sa medoo etaw di. ⁹Owoy sa bayi endà eg-anak, egpeanaken di anì umépê keangganan.

Meolò Datù Nemula i.

Salmo 115

Sebaen Daa Sa Tigtu Nemula

¹O Datù Nemula, endà mekedan sa kehidu ko taman melugay owoy kesaligan ka ma. Huenan di, kuna daa sa meolò, beken duu kami.

²Maen di ya eg-igsà sa medoo balangan etaw, guwaen da diyà kenami, “Kenà sa Nemula yu?” ³Dutu langit dò sa Nemula ké owoy

baelan di sumalà dé sa hagdi ungayà. ⁴Dodoo pilak daa owoy bulawan binaelan inetaw sa hagda egpenemulawen. ⁵Duen sa ebà da, dodoo endà egpekeikagi da. Duen ma sa mata da, dodoo endà eg-ilag da. ⁶Duen sa telinga da, dodoo endà egpekedineg da. Duen sa idung da, dodoo endà eghadek da. ⁷Duen sa belad da, dodoo endà egpekesabà da. Duen sa lisen da, dodoo endà egpekebigkat da, owoy endà ma egpekeikagi da. ⁸Mepion hedem amuk mekesuet sa medoo etaw migbael inetaw diyà sa inetaw binaelan da, owoy hediya ma sa medoo egsalig dahiya.

⁹O medoo etaw tegeIslaél, salig yu diyà si Datù Nemula. Kagdi sa tumabang keniyu owoy sa lagà kelasag yu. ¹⁰O medoo tegesimbà i Nemula, salig yu diyà si Datù Nemula. Kagdi sa tumabang keniyu owoy sa lagà kelasag yu. ¹¹Kiyu i langun etaw épê kekelimedang diyà si Nemula, salig yu diyà si Datù Nemula. Kagdi sa tumabang keniyu owoy sa lagà kelasag yu.

¹²Endà egkelipengan i Datù Nemula duu kita, huenan di tabangan di kita. Tabangan di sa medoo tegeIslaél owoy sa medoo tegesimbà di. ¹³Tabangan di sa langun etaw épê kekelimedang diyà kenagdi, iling ka dakel etaw ataw ka lagdà etaw.

¹⁴Mepion amuk meguwad yu owoy sa medoo tugod yu danà i Datù Nemula. ¹⁵Mepion amuk metabangan yu i Datù Nemula sa migbael langit owoy tanà.

¹⁶Si Datù Nemula épê sa langit, dodoo igbegay di siini tanà diyà sa medoo etaw. ¹⁷Beken sa medoo etaw nematay sa mekeolò si Datù Nemula, enù ka nekeangay da dé diyà bayà kenà da endà egséléken. ¹⁸Dodoo kita i medoo nehagtay pelà sa mekeolò si Datù Nemula ini egoh di owoy taman melugay.

Meolò Datù Nemula i.

Salmo 116

Eg-oloen Sa Etaw Nealukan Nemula I

¹Na, egpedakelan pedu ku Datù Nemula i, enù ka egdinegen di sa keumow ku owoy egsagbian di sa medoo igsimbà ku. ²Egsagipaen di aken, huenan di umumow a diyà kenagdi taman sa lugay ku nehagtay pelà.

³Lagà a ginapen sa katal mekepatay, owoy nekeuma diyà kenak sa egoh ku egkelimedangan sa kepatay ku. Tigtu a nebukul owoy nebogo a ma. ⁴Huenan di, mig-umow a diyà si Datù Nemula, guwaen ku, “O Datù Nemula, aluki ko aken.”

⁵Na, mehidu Datù Nemula i, sa Nemula ta, owoy metudà sa adat di owoy mipedu ma. ⁶Si Datù Nemula sa eg-ipat sa medoo lagdà etaw. Hê, egoh ku buyu egkematay, inalukan di aken.

⁷Mebaluy dema migtanà sa pedu ku, enù ka tigtu mepion sa binaelan i Datù Nemula diyà kenak. ⁸Inalukan di aken diyà sa tolol kenà ku mematay. Hinunas di sa medoo luhà ku, owoy pinediyù di ma aken diyà sa kenà ku medaetan. ⁹Huenan di, umunut-unut a diyà si Datù Nemula egoh ku pelà nehagtay diyà tanà. ¹⁰Danà sa kepigtuu ku diyà kenagdi, huenan di migsimbà a, guwaen ku, “O Datù Nemula, dakel sa kelikutan ku.” ¹¹Owoy egoh ku nebukul, mig-ikagi a, guwaen ku, “Anan butbuten siini medoo etaw.”

¹²Endà megaga ku duu mayadan diyà si Datù Nemula sa langun mepion binaelan di diyà kenak. ¹³Ini sa baelan ku. Soyolen ku sa tabù épê wain tandà sa kealuk di owoy oloen ku sa mapulù ngadan i Datù Nemula danà sa kinealuk di kenak. ¹⁴Ipetuu ku sa igpasad ku diyà si Datù Nemula diyà sa kenà sa medoo etaw di egkesetipon.

¹⁵Tigtu eghiduwan i Datù Nemula sa medoo etaw di, huenan di mesakit sa pedu di amuk duen sa mematay. ¹⁶O Datù Nemula, egpangunut a doo diyà keniko lagà sa binaelan sa inay ku egoh anay, owoy inalukan ko aken egoh ku buyu egkematay.

¹⁷O Datù Nemula, begayan ku kuna sa tandà kepesalamat ku,^b owoy sumimbà a ma diyà keniko. ¹⁸Ipetuu ku sa igpasad ku diyà si Datù Nemula diyà sa kenà sa medoo etaw di egkesetipon, ¹⁹diyà sa duwangen sa Dalesan i Nemula dutu Hélusalém dò.

Meolò Datù Nemula i.

Salmo 119

Denu Sa Uledin I Nemula

¹Meanggan sa etaw épê metiengaw adat owoy sa egpangunut diyà sa uledin i Datù Nemula. ²Meanggan sa etaw egpigtuu diyà sa igsugù di owoy sa legkang pedu di egpangunut diyà kenagdi. ³Endà egbael da medaet, dodoo eg-ukit da polo diyà sa dalan igtulù i Nemula. ⁴O Datù Nemula, igbegay ko diyà kenami sa medoo uledin ko owoy igsugù ko diyà kenami sa tigtu tuu kepangunut. ⁵Mepion hedem amuk takà a mekepangunut diyà sa medoo igsugù ko. ⁶Amuk hediya, endà memalaan a amuk penemdemen ku sa langun igsugù ko. ⁷Oloen ku kuna danà sa pedu ku migketiengaw enù ka eg-inauwan ku sa metudà uledin ko. ⁸Pangunutan ku sa medoo igsugù ko, huenan di yaka egpandayà kenak.

Sa Kepangunut Diyà Sa Igsugù I Nemula

⁹Ngadan baelan sa batàbatà anì kumetiengaw sa adat di? Ini sa baelan di, pangunutan di sa kagi ko. ¹⁰Legkang diyà sa pedu ku sa kepangunut

^b 116:17 Duen sa uledin igsugkow i Mosis egoh anay denu sa kebegay sa etaw tandà sa kepesalamat da. Basa ko Lébitiko 7:12.

ku diyà keniko. Huenan di, yaka egpandayà kenak anì endà metipay ku duu sa medoo igsugù ko. ¹¹Igtagù ku sa kagi ko diyà sa pedu ku anì endà mekesalà a diyà keniko. ¹²Eg-oloen ku kuna, o Datù Nemula. Tului ko diyà kenak sa langun uledin ko. ¹³Sepelikùlikuan ku tumulon sa medoo uledin igbegay ko. ¹⁴Egkeanggan a egpangunut diyà sa medoo igsugù ko enù ka uman a pa nekekuwa't sa mapulù langun taman. ¹⁵Eg-inauwan ku sa medoo igsugù ko, owoy egpenemdemen ku sa medoo igtulù ko. ¹⁶Egkeanggan a egpangunut diyà sa medoo uledin ko, owoy endà melipengan ku duu sa kagi ko.

Meanggan Sa Etaw Egpangunut Diyà Sa Uledin I Nemula

¹⁷O Nemula, baeli ko sa mepion diyà kenak, aken i egsuguen ko, anì melalù a owoy mepangunutan ku ma sa kagi ko. ¹⁸Pegimata ko aken anì hauwen ku sa tigtu mepion igtulù diyà sa uledin ko. ¹⁹Beken siini tanà sa tigtu eg-ugpaan ku, huenan di yaka eglidung duu diyà kenak sa medoo igsugù ko. ²⁰Iya sa tigtu ungayà ku metiigan ku sa medoo uledin ko agdaw owoy sige. ²¹Eg-indawen ko sa medoo tegepeolbolò owoy pigtamayan ko, enù ka endà egpangunut da diyà sa medoo igsugù ko. ²²Yaka egpandayà duu sa kepelonon da kenak owoy sa kepeumàumà da kenak danà ku egpangunut diyà sa uledin ko. ²³Apiya di pa egsumbungen sa medoo ulu-ulu aken i egsuguen ko, penemdemen ku doo sa medoo igtulù ko. ²⁴Egkeanggan a danà sa medoo igtulù ko, enù ka iya sa kenà ku neketiig sa mepion egbaelan.

Keudes Egpangunut Diyà Sa Uledin I Nemula

²⁵Endà egpekegaga a enù ka buyu a dé egkematay, huenan di tabangi ko aken anì mehagtay a danà sa kagi ko. ²⁶Egoh ku migtulon diyà keniko sa medoo egkebaelan ku, sinagbian ko sa kesimbà ku. Na, tului ko diyà kenak sa medoo uledin ko. ²⁷Petiigi ko diyà kenak sa selepangan sa medoo uledin ko, agulé penemdemen ku sa medoo mekegaip binaelan ko. ²⁸Migkelungoy a dé danà sa bukul ku, huenan di pebagel ko aken danà sa kagi ko. ²⁹Tabangi ko aken anì endà mekeakal a, owoy tului ko sa uledin ko diyà kenak danà sa mepion pedu ko. ³⁰Hinemilì ku sa kepangunut ku diyà sa medoo igsugù ko, owoy pinedakelan pedu ku sa medoo uledin ko. ³¹O Datù Nemula, egpangunutan ku sa medoo igsasà ko. Huenan di, peiwodi ko diyà kenak sa kenà ku memalaan. ³²Egkeiyap a egpangunut diyà sa medoo igsugù ko, huenan di tabangi ko aken anì meumanan sa keketiig ku.

Sa Kesimbà Anì Metiigan Sa Uledin

³³O Datù Nemula, tului ko diyà kenak sa medoo uledin ko anì mepangunutan ku taman sa egoh ku nehagtay. ³⁴Petiigi ko diyà kenak sa medoo uledin ko

anì mepangunutan ku. Ipasad ku legkang diyà sa pedu ku sa kepangunut ku diyà sa uledin ko. ³⁵Tului ko diyà kenak sa ukit kepangunut ku diyà sa medoo uledin ko, enù ka iya sa egkeanggan ku. ³⁶Begayi ko diyà kenak sa ungayà ku mangunut diyà sa uledin ko, beken kekawasà daa sa ungayaen ku. ³⁷Pegauni ko aken diyà sa medoo endà miulan egbaelan. Pelalù ko aken danà sa kagi ko. ³⁸Aken sa egsuguen ko, huenan di petuuwi ko diyà kenak sa igpasad ko diyà sa medoo etaw épê kekelimedang diyà keniko. ³⁹Kedani ko diyà kenak sa medoo mekemala egbaelan, enù ka tigtu mepion sa medoo uledin ko. ⁴⁰Dakel sa ungayà ku mangunut diyà sa medoo igsugù ko. Pelalù ko aken danà sa adat ko metudà.

Denu Sa Kesalig Sa Etaw Diyà Sa Uledin I Nemula

⁴¹O Datù Nemula, pehauwi ko sa dakel kehidu ko diyà kenak owoy aluki ko aken enù ka iya sa igpasad ko. ⁴²Amuk hediya, mekesagbi a diyà sa medoo egpeumàumà kenak, enù ka egsalig a diyà sa kagi ko. ⁴³Begayi ko diyà kenak sa egkegaga ku egtulon sa kagi ko anan tuu, enù ka egsaligan ku sa medoo uledin ko. ⁴⁴Pangunutan ku takà sa medoo uledin ko taman melugay. ⁴⁵Kumepion sa hagtay ku enù ka endà meudipen a danà ku egpangunut diyà sa medoo igsugù ko. ⁴⁶Endà memalaan a tumulon sa medoo igsugù ko diyà sa medoo datù, ⁴⁷enù ka egkeanggan a egpangunut diyà sa medoo igsugù ko enù ka egkedakelan pedu ku sa uledin ko. ⁴⁸Eg-adatan ku sa medoo uledin ko owoy egkedakelan pedu ku ma, owoy egpenemdemen ku sa medoo igsugù ko.

Saligi Ko Sa Uledin I Nemula

⁴⁹Yaka egkelipeng duu sa igpasad ko diyà kenak, aken i egsuguen ko, enù ka iya sa egpaginawaen ku. ⁵⁰Apiya di pa egkelikutan a, egkeanggan a doo enù ka duen sa lalù igpasad ko diyà kenak. ⁵¹Apiya di pa tigtu a egpeumàumaan sa medoo tegepeolòlò, endà doo eg-ekedan ku duu sa uledin ko. ⁵²O Datù Nemula, egketulengan ku doo sa medoo tapay uledin ko, enù ka iya sa egbegay kekeanggan diyà kenak. ⁵³Tigtu a egbulit amuk eghauwen ku sa medoo tegebael medaet endà egpangunut diyà sa uledin ko. ⁵⁴Sumalà dé sa kenà ku eg-ugpà diyà siini tanà, takà a doo egduyuy danà sa medoo igsugù ko. ⁵⁵Apiya sigep, egpenemdemen ku doo kuna, o Datù Nemula, huenan di egkepangunutan ku sa uledin ko. ⁵⁶Iya sa naken keanggan sa kepangunut ku diyà sa medoo igsugù ko.

Kedakelan Pedu Di Sa Uledin I Nemula

⁵⁷O Datù Nemula, kuna daa sa diyà pedu ku. Huenan di, ipasad ku sa kepangunut ku diyà sa medoo uledin ko. ⁵⁸Legkang diyà sa pedu ku sa kepegeni ku diyà keniko, hiduwi ko aken enù ka iya sa igpasad ko. ⁵⁹Egoh ku egpenemdem denu sa adat ku, netuing sa pedu ku anì mangunut a diyà sa medoo uledin ko. ⁶⁰Migpetéél a anì endà meéngén sa kepangunut ku diyà sa medoo igsugù ko. ⁶¹Apiya di pa legenen a sa medoo tegebael medaet,

endà doo lipengen ku duu sa uledin ko. ⁶²Amuk teliwadà sigep, umenaw a anì pesalamat a diyà keniko danà sa uledin ko metudà. ⁶³Aken sa loyuken sa langun etaw épê kekelimedang diyà keniko owoy sa egpangunut diyà sa uledin ko. ⁶⁴O Datù Nemula, nekeseluh diyà siini uwang tanà sa dakel kehidu ko, huenan di tului ko diyà kenak sa medoo igsugù ko.

Sa Kiulan Sa Uledin I Nemula

⁶⁵O Datù Nemula, medoo sa mepion egbaelan ko diyà kenak, aken i egsuguen ko, enù ka neketuu sa igpasad ko. ⁶⁶Begayi ko diyà kenak sa milantek penemdem owoy sa keketiig, enù ka egsalig a diyà sa medoo igsugù ko. ⁶⁷Egoh ko endà pelà mig-indaw kenak, lagà a netelas. Dodoo ini egoh di egpangunutan ku dé sa kagi ko. ⁶⁸Anan mepion sa langun egbaelan ko owoy mipedu ka ma, huenan di tului ko diyà kenak sa medoo igsugù ko. ⁶⁹Apiya di pa egtipuwen a sa medoo etaw tegepedakeldakel, mebagel doo sa pedu ku egpangunut diyà sa medoo igsugù ko. ⁷⁰Endà egpeketiig siini medoo etaw tegepedakeldakel, dodoo aken egkeanggan a polo danà sa uledin ko. ⁷¹Mepion sa kineindaw ko kenak, enù ka danà iya wé, netiigan ku sa medoo igsugù ko. ⁷²Uman pa miulan diyà kenak sa uledin ko diyà sa kiulan sa medoo bulawan owoy pilak.

Sa Ketuu Sa Uledin I Nemula

⁷³O Nemula sa migbael kenak owoy sa egtulik kenak, begayi ko aken sa keketiig anì mekepangunut a diyà sa medoo uledin ko. ⁷⁴Egkeanggan sa medoo etaw épê kekelimedang diyà keniko amuk eghauwen da aken, enù ka egsalig a diyà sa kagi ko. ⁷⁵O Datù Nemula, netiigan ku metudà sa keantang ko enù ka nekeenget sa keindaw ko kenak. ⁷⁶Begayi ko aken sa kekeanggan danà sa kehidu ko endà egkehalì, enù ka iya sa igpasad ko diyà kenak, aken i egsuguen ko. ⁷⁷Pehauwi ko diyà kenak sa dakel kehidu ko anì kumelalù a, enù ka egkeanggan a danà sa uledin ko. ⁷⁸Mepion hedem amuk memalaan sa medoo tegepeolòlò danà sa ketipu da kenak. Dodoo aken, penemdemen ku polo sa medoo uledin ko. ⁷⁹Pandayà ko amuk mangay diyà kenak sa medoo etaw épê kekelimedang diyà keniko owoy sa medoo neketiig sa igsugù ko. ⁸⁰Ungayà ku endà sumekê a mangunut diyà sa medoo igsugù ko anì endà memalaan a.

Kesimbà Denu Sa Kealuk

⁸¹O Datù Nemula, egkepuleg a dé eg-angat-angat sa kealuk ko, dodoo tapay a doo egsalig diyà sa kagi ko. ⁸²Egpetumàmaen ku eg-angat-angat sa kepetuu ko sa pasad ko. Eg-igsà a, “Nengan pa sa egoh ko tumabang kenak?” ⁸³Apiya di pa endà duen ulan ku i, enù ka lagà a daa sa tapay kunul hinagtay inawuhan wain, endà doo eglipengen ku duu sa medoo igsugù ko. ⁸⁴Ngadan taman di ya meelut sa keangat-angat ku? Nengan pa sa

kepigtamay ko sa medoo etaw egpelihay kenak? ⁸⁵Sa medoo tegepeolòlò endà egpangunut diyà sa uledin ko, lagà da egbael kaseb kenà ku menabù. ⁸⁶Anan kesaligan sa langun igsugù ko. Aluki ko aken kedu diyà sa medoo etaw egtipu kenak. ⁸⁷Buyu dé eg-imatayan da aken, gasama iya tapay doo meeles sa kepangunut ku diyà sa medoo uledin ko. ⁸⁸Pelalù ko aken danà sa dakel kehidu ko anì mekeuman a pa mangunut diyà sa medoo uledin ko.

Sa Kesalig Diyà Sa Uledin I Nemula

⁸⁹O Datù Nemula, endà mekedan sa kagi ko diyà langit taman melugay owoy endà ma mehalì di. ⁹⁰Endà ma mekedan sa egoh ko egkesaligan taman melugay, owoy endà ma mehalì siini uwang tanà pineduen ko. ⁹¹Tapay doo duen sa medoo uledin ko taman ini egoh di, enù ka lagà egsugùsuguen ko sa langun taman eghauwen. ⁹²Amuk beken daa uledin ko sa keduwan sa kekeanggan ku, mematay a doo danà sa medoo kelikutan ku. ⁹³Endà lipengen ku duu sa medoo igsugù ko, enù ka egbegayan ko aken lalù danà sa uledin ko. ⁹⁴Aken sa etaw ko, huenan di aluki ko aken, enù ka iya sa ungayà ku mepangunutan ku sa medoo uledin ko. ⁹⁵Apiya di pa egpelaeban a sa medoo etaw tegebael medaet, penemdemen ku doo sa medoo uledin ko. ⁹⁶Netiigan ku endà negulub sa medoo eghauwen diyà tanà, dodoo endà duen ketamanan sa igsugù ko.

Pinedakel Di Diyà Sa Pedu Di Sa Uledin I Nemula

⁹⁷Na, tigtu egkedakelan pedu ku sa uledin ko, huenan di egpenemdemen ku elut agdaw. ⁹⁸Miglowon sa kilantek ku diyà sa kilantek sa medoo kuntelà ku, enù ka endà egkelengà sa uledin ko diyà sa pedu ku. ⁹⁹Miglowon pa sa naken keketiig diyà sa keketiig sa langun migtulù kenak, enù ka egpenemdemen ku sa medoo igtulù ko. ¹⁰⁰Uman pa milantek sa naken netiigan diyà sa netiigan sa medoo lukes, enù ka takà a egpangunut diyà sa medoo igsugù ko. ¹⁰¹Iniwod ku sa langun medaet egbaelan anì mepangunutan ku sa kagi ko. ¹⁰²Endà ininiyugan ku duu sa medoo uledin ko, enù ka kuna sa migtulù kenak. ¹⁰³Tigtu mepion diyà kenak sa medoo kagi ko, enù ka uman pa meemis diyà sa keemis sa teneb. ¹⁰⁴Egkeumanan sa ketiigan ku danà sa medoo uledin ko, huenan di egkelepuhan ku sa medoo medaet egbaelan.

Denu Sa Legdaw Kedu Diyà Sa Uledin I Nemula

¹⁰⁵Sa kagi ko, iya sa sulù diyà sa ukitan ku owoy sa legdaw diyà sa dalan ku. ¹⁰⁶Ipetuu ku sa igpasad ku mangunut diyà sa medoo metudà uledin ko. ¹⁰⁷O Datù Nemula, tigtu dakel sa kelikutan ku, huenan di pelalù ko aken enù ka iya sa igpasad ko. ¹⁰⁸O Datù Nemula, dineg ko sa kesimbà ku egpesalamat, owoy tului ko diyà kenak sa medoo uledin ko. ¹⁰⁹Apiya di pa takà a buyu egkematay, endà doo lipengen ku duu sa uledin ko. ¹¹⁰Sa medoo

etaw tegebael medaet, egbaelan da sa lagà litag kenà ku megapen, dodoo endà egtipayen ku duu sa medoo igsugù ko. ¹¹¹Piulanen ku sa medoo igsugù ko taman melugay, enù ka tigtu egkeangganen ku sa uledin ko. ¹¹²Huenan di, ungayà ku mepangunutan ku sa medoo uledin ko taman melugay.

Mealukan Sa Etaw Danà Sa Uledin I Nemula

¹¹³Egkelepuhan ku sa medoo etaw duwa-duwa egpangunut diyà keniko. Dodoo aken, egkedakelan pedu ku sa uledin ko. ¹¹⁴Kuna sa tegesegumalang kenak owoy sa lagà kelasag ku, owoy iya daa sa egsaligan ku sa kagi ko. ¹¹⁵Na, kiyu i medoo tegebael salà, pediyù yu diyà kenak anì mepangunutan ku sa medoo igsugù i Nemula, sa Nemula egpigtuuwen ku. ¹¹⁶O Datù Nemula, pebagel ko aken anì kumelalù a, enù ka iya sa igpasad ko. Yaka egpandayà kenak diyà sa kenà ku memalaan danà ku egsalig diyà keniko. ¹¹⁷Ipat ko aken anì endà duen sa medaet mebaelan diyà kenak. Amuk hediya, mepangunutan ku takà sa medoo igsugù ko. ¹¹⁸Dodoo ininiyugan ko polo sa langun etaw egsekê diyà sa medoo uledin ko, enù ka neakalan da daa diyà sa hagda munoy penemdem. ¹¹⁹Diyà sa kehaa ko, lagà lupuk daa sa langun etaw tegebael medaet. Huenan di, egkedakelan pedu ku sa medoo igsugù ko. ¹²⁰Eglukub a danà ku egkelimedangan keniko enù ka egpesu a sa kekukum ko.

Denu Kepangunut Diyà Sa Uledin I Nemula

¹²¹Binaelan ku sa metudà owoy sa nesugat diyà sa kehaa ko, huenan di yaka egpandayà kenak diyà sa medoo kuntelà ku. ¹²²Petuuwi ko sa ketabang ko kenak, aken i egsguen ko. Yaka egpandayà kenak amuk peumàumaan a sa medoo tegepeolòlò. ¹²³Egpetumàmaen ku eg-angat-angat sa kepetuu ko sa igpasad ko umaluk kenak. ¹²⁴Sagipà ko aken i egsguen ko danà sa dakel kehidu ko, owoy tului ko diyà kenak sa medoo igsugù ko. ¹²⁵Aken sa egsguen ko, huenan di begayi ko aken sa milantek penemdem anì metiigan ku sa medoo igsugù ko. ¹²⁶O Datù Nemula, ini dé sa gai ko petuu sa ungayà ko, enù ka tinipay sa medoo etaw sa uledin ko. ¹²⁷Tigtu egkedakelan pedu ku sa medoo igsugù ko, enù ka uman pa sa kepedakel ku sa igsugù ko diyà sa kepedakel ku sa tigtu bulawan. ¹²⁸Huenan di, egpangunutan ku sa langun igsugù ko, dodoo egkelepuhan ku sa langun medaet egbaelan.

Ungayà Di Mangunut Diyà Sa Uledin I Nemula

¹²⁹Mekegaip sa medoo igtulù ko, huenan di tigtu a egkeiyap egpangunut. ¹³⁰Egkeilag pedu sa etaw danà da neketiig selepangan sa kagi ko, labi pa sa etaw endà duen netiigan. ¹³¹Tigtu dakel sa ungayà ku meketiig sa medoo igsugù ko. ¹³²Hahaa ko aken owoy hiduwi ko ma aken, éhê sa egbaelan ko diyà sa medoo etaw egpedakel pedu diyà keniko. ¹³³Sa kagi ko sa menulù kenak diyà sa ukitan ku anì endà

metabanan a sa medaet. ¹³⁴Aluki ko aken diyà sa medoo etaw egpelihay kenak anì mepangunutan ku sa medoo igsugù ko. ¹³⁵Pehauwi ko sa kehidu ko diyà kenak, owoy tului ko diyà kenak sa medoo uledin ko. ¹³⁶Tigtu a egsinegaw enù ka endà egpangunutan sa medoo etaw duu sa uledin ko.

Metudà Sa Uledin I Nemula

¹³⁷O Datù Nemula, metudà sa adat ko owoy nesugat sa keantang ko. ¹³⁸Anan tuu sa medoo igsugù ko owoy kesaligan ma. ¹³⁹Tigtu a nepenù bulitan, enù ka egpeulanen sa medoo kuntelà ku sa medoo uledin ko. ¹⁴⁰Kesaligan sa medoo igpasad ko, huenan di tigtu egpedakelen ku diyà sa pedu ku, aken i egsuguen ko. ¹⁴¹Apiya di pa lagdà etaw a daa owoy egpelononon a ma, endà doo egkelipengan ku duu sa medoo igsugù ko. ¹⁴²Metudà sa adat ko taman melugay owoy anan tuu sa medoo uledin ko. ¹⁴³Apiya di pa tigtu a egkebogo owoy medoo sa kelikutan ku, egkeanggan a doo danà sa medoo uledin ko. ¹⁴⁴Metudà sa medoo igsugù ko taman melugay. Huenan di, petiigi ko diyà kenak anì kumelalù a.

Sa Kesimbà Anì Mealukan I Nemula

¹⁴⁵O Datù Nemula, legkang diyà sa pedu ku sa keumow ku keniko, huenan di sagbii ko aken, hih. Pangunutan ku sa medoo igsugù ko. ¹⁴⁶Eg-umow a diyà keniko, aluki ko aken anì mepangunutan ku sa medoo uledin ko. ¹⁴⁷Lapus a eg-enaw egoh sa agdaw endà pa egteleséng, owoy egpegeni a sa ketabang ko enù ka egsalig a diyà sa kagi ko. ¹⁴⁸Endà egtudug a amuk sigep enù ka egpenemdemen ku sa medoo igpasad ko. ¹⁴⁹O Datù Nemula, dineg ko sa kepegeni ku danà sa kehidu ko. Sumpati ko sa lalù ku enù ka metudà sa ukit ko. ¹⁵⁰Egdapagen a sa medoo medaet etaw tegepelihay, dodoo mediyù da diyà sa uledin ko. ¹⁵¹Dodoo medapag ka diyà kenak, o Datù Nemula, owoy anan tuu sa medoo uledin ko. ¹⁵²Edung egoh anay netiigan ku endà mekedan sa medoo uledin ko taman melugay.

Sa Kesimbà Anì Tabangan I Nemula

¹⁵³Hahaa ko sa lihay ku owoy aluki ko aken, enù ka endà egkelipengan ku duu sa medoo uledin ko. ¹⁵⁴Tampili ko sa ketuu egtigdegan ku owoy aluki ko aken anì melalù a, enù ka iya sa igpasad ko. ¹⁵⁵Endà dé mealukan sa medoo tegebael medaet, enù ka endà egpangunut da diyà sa medoo uledin ko. ¹⁵⁶Dodoo dakel sa kehidu ko, o Datù Nemula, huenan di begayi ko aken lalù enù ka metudà sa ukit ko. ¹⁵⁷Apiya di pa medoo sa kuntelà ku egpelihay kenak, endà doo sumekê a diyà sa medoo uledin ko. ¹⁵⁸Egkelepuhan ku sa medoo etaw lampawì, enù ka endà egpangunut da diyà sa medoo igsugù ko. ¹⁵⁹O Datù Nemula, netiigan ko sa egoh

di egkedakelan pedu ku sa igtulù ko. Huenan di, begayi ko aken lalù danà sa dakel kehidu ko. ¹⁶⁰Anan tuu sa langun kagi ko, owoy endà ma mekedan sa medoo metudà uledin ko taman melugay.

Sa Kepangunut Diyà Sa Uledin I Nemula

¹⁶¹Apiya di pa endà duen sa pesuwan ku, egpeumàumaan a doo sa medoo ulu-ulu. Dodoo legkang diyà sa pedu ku sa keadat ku sa kagi ko. ¹⁶²Egkeangganan ku sa kagi ko, lagà sa kekeanggan sa etaw nekehaa sa mapulù langun taman. ¹⁶³Egkelepuhan ku sa medoo butbuten, dodoo egkedakelan pedu ku sa uledin ko. ¹⁶⁴Uman agdaw mesagkat sa kepesalamat ku diyà keniko danà sa uledin ko metudà. ¹⁶⁵Tigtu melanih sa keugpà sa etaw amuk egkedakelan pedu da sa uledin ko, owoy endà duen sa mekepedaet kenagda. ¹⁶⁶O Datù Nemula, eg-angat-angatan ku sa kealuk ko kenak, huenan di egpangunutan ku sa medoo uledin ko. ¹⁶⁷Tigtu egkedakelan pedu ku sa medoo igsugù ko, owoy egpangunutan ku ma. ¹⁶⁸Tuu ma doo, egpangunutan ku sa medoo uledin ko owoy sa medoo igsugù ko, enù ka netiigan ko sa langun egbaelan ku.

Sa Kesimbà Egpegeni Ketabang

¹⁶⁹O Datù Nemula, dineg ko sa keumow ku diyà keniko. Begayi ko aken sa milantek penemdem danà sa kagi ko. ¹⁷⁰Dinegdineg ko sa kesimbà ku, owoy aluki ko ma aken enù ka iya sa igpasad ko. ¹⁷¹Takaan ku kuna eg-olò enù ka igtulù ko diyà kenak sa medoo uledin ko. ¹⁷²Owoy duyuyen ku sa kagi ko, enù ka anan metudà sa langun igsugù ko. ¹⁷³Tapay ko dé sa itabang ko kenak, enù ka nehemilì ku dé sa kepangunut ku diyà sa medoo igsugù ko. ¹⁷⁴O Datù Nemula, eg-angat-angatan ku sa kealuk ko kenak, owoy egkeangganan ku sa uledin ko. ¹⁷⁵Pelalù ko aken anì mekeolò a keniko owoy anì metabangan a ma danà sa uledin ko. ¹⁷⁶Aken sa egsuguen ko, dodoo nekesekê a lagà sa kebilibili netelas, huenan di pengaa ko aken, enù ka endà egkelipengan ku duu sa medoo uledin ko.